

15.07.2026

UKA2026/430

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Sulinerup saniatigut isertitat akileraarutitigut oqilisaaffigineqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut kingusinnerpaamik UPA2027-imi akileraaruserinermut inatsisip allanngortinneqarnissaanut siunnersuummik saqqummiusseqqullugit peqquneqassapput, taamaalilluni innuttaasut nalinginnaasumik imaluunniit ileqquusumik suliffimmik saniatigut nammineq piumassutsiminnik immikkut suliaqarnermikkut isertitaat nalinginnaasumik inuttut isertitanut sanilliullugit akileraarutitigut oqilisaaffigineqarsinnaaqqullugit.

Aaqqissuussinermut ilaatigut piffissaq nalinginnaasumik suliffiusartoq sinnerlugu sulineq, immikkut vagteqarnerit kiisalu sulisitsisumi allami saniatigut sulineq ilaatinneqassapput. Aaqqissuussineq innuttaasut amerlanerusumik suleqqajaalernissaannik, sulisoqarnikkut periarfissat annertusarnissaannik aammalu Kalaallit Nunaanni sulisussanik pisariaqartitsineq nunami maani sulisinnaasut pioreersut annertunerusumik atorlugit matussuserneqarnissaanik siunertaqassaaq.

(Inatsisartunut ilaasortaq Isak Johannessen, Naleraq)

Tunngavilersuut

Siunnersuut akileraaruserinermut inatsisip allanngortinneqarnissaanik pisariaqartitsissaaq.

Sulinerup saniatigut nalunaaquttap-akunneranut ataatsimut akileraarutitigut isertitat annikinnerulersinnaapput, tamannali innuttaasut amerlanerusumik sulinerisigut, suliffiup nalunaaquttap-akunnerisa amerlanerulernerisigut, aningaasarsiornikkut ingerlatsinerup annertusineratigut aammalu akileraarutitigut isertitat tamarmiusut qaffannerisigut ilaannakortumik imaluunniit tamakkerlugu matussuserneqarnissaa naatsorsuutigineqarpoq.

Tamatuma saniatigut siunnersuut nunanit allanit sulisussarsiornissamik pisariaqartitsineq annikillisissinnaavaa aammalu pisortani namminersorlutillu suliffeqarfinni sulisussatigut periarfissat nukittorsarsinnaallugit.

Kalaallit Nunaat amerlanerusunik sulisoqarnissamik pisariaqartitsivoq – ikinnerusunik pinnani.



Siunnersuut tunngaviumik paasiuminartumik ima aallaaveqarpoq: amerlanerusumik sulineq imaluunniit suliffeqarfinni ataasiinnaanngitsuni sulineq imminut akilersinnaasariaqarpoq.

Tamanna innuttaasumut ataasiakkaamut, suliffeqarfinnut, pisortat suliffeqarfiutaannut aammalu Kalaallit Nunaata aningaasaqarneranut tamarmiusumut iluaqutaassaaq.

Kalaallit Nunaanni suliassaqarfinni assigiinngitsuni, ilaatigut peqqinnissaqarfimmi, utoqqaat illuini, aalisarnermi, sanaartornermi, angallassinermi kiffartuussinermilu sulisussaaleqisoqarpoq. Peqatigitillugu innuttaasut amerlasuut aalajangersimasumik suliffeqareersut saniatigut amerlanerusunik sulerusuttarput imaluunniit saniatigut suliffeqarusuttarlutik.

Massakkut akileraarusersueriaaseq pissutigalugu immikkut sulinerup aningaasatigut iluaqutaanera ilaannikkut annikippallaartutut misigineqarsinnaavoq. Tamanna innuttaasut amerlanerusunik sulerusussusiannut killiliisinnaavoq, naak suliffeqarfiit inuiaqatigiillu sulisunik amerlanerusunik pisariaqartitsigaluartut.

Inuiaqatigiinni innuttaasut nammineq piumassutsiminnik amerlanerusunik sulerusuttut iluaqutissarsitinneqarnissaat pingaaruteqarpoq. Akileraarusersueriaaseq sulerusussusermik akisussaassusearnermillu tapersersuisariaqarpoq, immikkut sulineq aningaasatigut pilerinarunnaarsinngikkaluarlugu.

Siunnersuutip siunertaraa sulinerup saniatigut isertitat nalinginnaasumik sulinermit isertitanut sanilliullugit akileraarutitigut oqilisaaffigineqarnissaat. Taamaaliornikkut innuttaasut amerlanerusunik sulinissaannut kajumissuseqalersinneqarsinnaapput, sulisussaaleqineq annikillisinneqarsinnaavoq aammalu Kalaallit Nunaata aningaasaqarnera nukittorsarneqarsinnaavoq.

Peqatigitillugu siunnersuutip Kalaallit Nunaanni innuttaasut amerlanerusut immikkut sulinissaannut periarfissillugit suliffeqarfiit pisortallu suliffeqarfiutaat nunanit allanit sulisussarsiornissamik pisariaqartitsinerat annikillisarsinnaavaa.

Pisortanut aningaasaqarnikkut allaffissornikkullu kingunerisassat

Siunnersuut sulinerup saniatigut isertitanut akileraarutitigut isertitat annikinnerulernerannik kinguneqarsinnaavoq. Tamanna innuttaasut amerlanerusumik sulinerisigut, amerlanerusunik suliffiup nalunaaquttap-akunnerinik suliaqarnikkut, aningaasarsiornikkut ingerlatsinerup annertusineratigut aammalu tamatumunnga atasumik akileraarutitigut isertitat tamarmiusut qaffannerisigut ilaannakortumik imaluunniit tamakkerlugu matussuserneqarsinnaavoq.

Siunnersuutip piviusunngortinneqarnissaa akileraaruserinermut inatsisip allanngortinneqarnissaanik pisariaqartitsissaaq, taamaattumillu inatsisiliornissamut piareersaanermut aammalu atuutsilersitsinermut atatillugu allaffissornikkut aningaasartuuteqartoqarnissaa naatsorsuutigineqassaaq. Inatsisartut Allattoqarfiata inatsisiliornikkut siunnersuineranut atatillugu naliliineratigut, akileraaruserinermut inatsisip allanngortinneqarnissaanut siunnersuummik suliaqarnermut AC-fuldmægtigip ataatsip sulineranut naapertuuttumik sulisussaqarnissaaq pisariaqartinneqarsinnaavoq.

Tamatuma saniatigut akissarsialerinermi aammalu akileraaruserinermi aaqquissuussinernik naleqqussaananermut, piffissaaq nalinginnaasumik suliffiusartoq sinnerlugu sulinerup, immikkut vagteqarnerit aammalu allatigut saniatigut isertitat nalunaarsorneqartarnerannut naatsorsorneqartarnerannullu kiisalu kingornatigut akissarsiat akileraarutillu allaffissornikkut suliarineqartarnerannut atatillugu allaffissornikkut aningaasaqarnikkullu kingunerisassaqarnissaa naatsorsuutigineqassaaq.

Aningaasaqarnikkut kingunerisassat qanorpiaq annertutigissanersut aaqquissuussinerup qanoq ilusilersorneqarnissaanik apeqquteqassapput, taamaattumillu taakku aatsaat Naalakkersuisunit inatsisiliornissamut piareersaalluni suliaq ingerlanerani erseqqinnerusumik naatsorsorneqarsinnaassapput.

Namminersorlutik inuussutissarsiortunut aningaasaqarnikkut allaffissornikkullu kingunerisassat

Siunnersuut suliffeqarfiit sulisunik immikkut vagteqartitsinissamut, piffissaaq nalinginnaasumik suliffiusartoq sinnerlugu sulisitsinissamut imaluunniit saniatigut sulinermut kajumilersitsinissaannut ajornannginnerulersitsinnaavoq, taamaalillunilu sulisussaaleqinerup annikillisinneqarnissaanut iluaqutaasinnaalluni.

Aaqquissuussinerli aamma namminersorlutik inuussutissarsiortunut allaffissornikkut aningaasaqarnikkullu kinguneqarsinnaavoq, ilaatigut akissarsialerinermut aaqquissuussinernik, sulinermut piffissap nalunaarsorneqartarneranik aammalu akissarsiat nalunaarutigineqartarnerannik pisariaqartumik naleqqussaaniissaaq pissutigalugu. Kingunerisassat annertussusaat aaqquissuussinerup qanoq ilusilersorneqarnissaanik apeqquteqassapput.

Innuttaasunut aningaasaqarnikkut allaffissornikkullu kingunerisassat

Siunnersuut innuttaasut nammineq piumassutsiminnik immikkut suliumasut sulinerminnit aningaasaqarnikkut annertunerusumik pissarsinissaannut periarfissiisinnavaoq. Aaqquissuussineq innuttaasunut paasiuminarlunilu allaffissornikkut sapinngisamik artukkiinngitsumik ilusilerneqartariaqarpoq.